

STATUTS
DA LA GIUVENTÜNA
STA. MARIA / VALCHAVA

Art. 1

Suot il nom "Giuventüna Sta. Maria / Valchava" exista cul sez a Sta. Maria üna società i'l segn da Art. 60 ff dal Cudesch civil svizzer (CCS).

Art. 2

La società "Giuventüna Sta. Maria / Valchava" ha sco scopo il mantegniment da la rait sociala tanter la giuventüna da Sta. Maria e Valchava. Ella perseguitescha laprò ils seguaints böts:

- Organisar differents evenimaints cul böt da gnir insembel e's chatter tanter ils comembers.
- Actuar in ün möd, chi permetta a la società da guadagner raps, cul böt da tils investir in evenimaints pels comembers.
- Sustegner il mantegniment da la lingua rumantscha.
- La società es neutrala in regard politica e religiun as metta pero aint pels interess dals comembers uschè inavant chi fa segn.

Ils detagls areguard l'organisaziun e gestiun dals evenimaints vegnan reglats illa suprastanza.

Art. 3

Ils möds financials as mettan insembel our da las contribuziuns anualas ed our dals rechavs dals evenimaints organisats da la società.

Art. 4

L'on da gestiun da la società düra adüna dals 27 december fin als 26 december dal prossem on.

Art. 5

La società "Giuventüna Sta. Maria / Valchava" nun as lascha registrar i'l Register da commerzi.

ORGANISAZIUN

Art. 6

Ils organs da la società "Giuventüna Sta. Maria / Valchava" sun ils seguaints:

1. Radunanza generala
2. Suprastanza
3. Post da revisiun

RADUNANZA GENERALA

Art. 7

La Radunanza generala ordinaria chatta lö üna jada l'on. Ella vegn clamada aint tras la Suprastanza suot partecipaziun da la glista da tractandas e las infuormaziuns da data, lö ed urari. L'invüd a la radunanza generala vegn tramis per scrit fin il plü tard 10 dis avant.

Moziuns dals comembers ston gnir fattas in scrit fin il plü tard 1 di avant la radunanza generala.

Radunanzas generalas extraordinaras vegnan clamadas aint i'l listess möd scha la Radunanza generala, la Suprastanza o ün tschinchavel dals comembers giavüscha quist.

Art. 8

La Radunanza generala vegn manada dal president e decida sur da admissiuns e demissiuns da comembers, elea la Suprastanza e'l Post da revisiun. Supraplü decida la Radunanza generala sur da tuot ils affars, chi nu sun reglats tenor letscha o chi sun surdats ad oters organs tenor statuts. Ella po relaschar ils oters organs a mincha temp schi da ün scoppo important per quist.

Art. 9

Decisiuns da la Radunanza generala vegnan trattas culla majoria da las vuschs dals comembers preschaints. Las unicas excepziuns sun Art. 19 e Art. 20. Pro igualità da las vuschs decida il/la president/a cun vusch da tagl. Las decisiuns vegnan trattas per man uschè lönch cha la Radunanza generala nu decida alch oter. Las decisiuns vegnan protocolladas e'ls protocols vegnan suottascrit dal president e dal manader da protocol.

Sur dad affars na protocollats nu po gnir decis. Quistas decisiuns sun contestablas.

Igual ad üna decisiun da la Radunanza generala es la approvaziun in scritta d'üna majoria dals comembers.

Art. 10

Decisiuns chi nu correspuondan a la letscha o als statuts poulan gnir contestats da mincha comember chi nun ha approvà aifer ün mais davo ch'el o ella ha survgnü cognuschentscha da la decisiun.

SUPRASTANZA

Art. 11

La Suprastanza as metta insembel our da:

- Ün(a) president(a)
- Ün(a) vice-president(a)
- Ün(a) actuar(a)
- Ün(a) chaschier(a)
- Ün(a) chef(a) da material
- Duos suppleants(as)

La Suprastanza as constituescha svesa ed es al listess mumaint il comitè d'organisaziun dals evenimaints da la società.

Il/La president/a scriva minch'on ün raport sur da la gestiun da la società a mans da la Radunanza generala. Il/La chaschier/a preschainta a la Radunanza generala il rendaquint dal on da gestiun ed ün preventiv pel on seguint.

Il/La vice-president/a surpiglia tuot las caricadas dal/da la president/a scha quel/la es impedi/da.

Art. 12

La Suprastanza executa las decisiuns da la Radunanza generala e maina la gestiun da la società. Ella elavurescha ils reglamaints necessaris per la gestiun da la società e tils preschainta a la Radunanza generala per approvaziun.

Ils comembers da la Suprastanza sun autorisats dad executar tuot ils acts giuridics i'l nom da la società chi correspuondan al scoppo da la società ed al dis-charg da la Radunanza generala.

Art. 13

La Suprastanza es cumpetenta da decider scha almain 3 comembers da la Suprastanza sun preschaints. Ella decida cun majoria da las vuschs. Pro egalità da las vuschs decida il/la president/a cun vusch da tagl. Las decisiuns da la Suprastanza nu vegnan protocolladas.

Pro decisiuns chi pertuccan al normal affar da mincha di po il president decider sainza consultar a la Suprastanza.

Decisiuns da la Suprastanza poulan gnir contestadas da mincha comember da la società scha quellas violeschan la letscha, ils statuts o eventuels reglamaints da la società.

Art. 14

La Radunanza generala elea il/la president/a e'ls/las oters/otras comembers/as da la Suprastanza per üna dürada da trais ons.

POST DA REVISIUN

Art. 15

Il Post da revisiun subsista our da duos personas. El controlla il rendaint dal/da la chaschier/a e scriva a man da la Radunanza generala ün raport da revisiun in scrit e fa sia proposta da dis-charg da la Suprastanza.

Ils comembers dal Post da revisiun nu stoulan esser comembers da la società. Els vegnan elets da la Radunanza generala per üna dürada da trais on.

COMEMBRANZA

ADMISSIUNS

Art. 16

La admissiun da novs/as comembers/as po succeder a mincha mumaint. Ella capita tras l'approvaint da la Radunanza generala.

Tout part poulan tuot las personas chi han terminà la scoula fundamentala e chi nu sun amo maridats.

DEMISSIUNS ED EXCLUSIUNS

Art. 17

La demissiun as po executar a la fin da mincha on da gestiun o pro scoppos importants per scrit. Pro üna marida sorta mincha comember automaticamaing da la società.

Ün/a comember/ra po gnir exclus/a da la società tras la Radunanza generala sainza nominaziun da scoppos.

CONTRIBUZIUNS

Art. 18

Sco contribuziun annuala vaglian CHF 50.00. In cas da dons/accidaints o fallimaint da la società sta avantman be il chapital da la società per cuerner ils cuosts e na singuls/as comembers/ras.

LIQUIDAZIUN DA LA SOCIETÀ

Art. 19

La società as po liquidar svesa a mincha mumaint tras decisiun da la Radunanza generala. Pro quista decisiun stoulan esser preschaint almain la mità dals comembers e la decisiun sto gnir approvada cun üna majoria da 2/3 da las vuschs.

In cas d'ün surplü da la liquidaziun vegn quist surdat sco donaziun ad ün'otra società da la Val Müstair.

La fusiun cun ün'otra società es igual a la liquidaziun da la società.

MÜDAMAIN DALS STATUTS


Art. 20

Quists statuts rimplazzan per subit tuot ils status e reglamaints existents da las Gjuventünas Sta. Maria e Valchava.


Quists statuts poulan be gnir müdats tras la Radunanza generala cun üna majoria da 2/3 da las vuschs.

Sta. Maria, 26 december 2006

Il president da la Radunanza generala


Romedi Conradin

Il manader da protocol da la Radunanza generala


Cristian Hohenegger

(Id existan trais exemplars originals da quists statuts)

Ils comembers da la Radunanza generala:

Vair annex